

Date	26 Februari 2013
Title	Anwar mudah lupa kawan
Publication	Berita Harian
Page	14

Anwar mudah lupa kawan

» Pernah luah kekesalan ketika dalam penjara

Oleh Mohd Azrone Sarabatin
azrone@bharian.com.my

■ Bangi

Bekas kawan baik Ketua Pembangkang, Datuk Seri Anwar Ibrahim mendakwa pemimpin itu adalah seorang yang mudah lupa rakan sendiri apabila mendapat jawatan besar, terutama ketika menjawat jawatan Timbalan Perdana Menteri.

Dekan Kulliyah Ilmu Wahyu dan Sains Kemanusiaan Universiti Islam Antarabangsa Malaysia (UIAM), Prof Datuk Mahmood Zuhdi Abdul Majid, berkata beliau dan Anwar adalah sahabat baik ketika pemimpin itu belum memegang jawatan besar dalam kerajaan.

Bagaimanapun, katanya, ketika beliau memegang jawatan besar dalam Kabinet Kerajaan Pusat, Ahli Parlimen Permatang Pauh itu sudah tidak mengenalinya.

"Ketika memimpin ABIM (Angkatan Belia Islam Malay-

sia), Anwar mempelawa saya menyertai persatuannya, namun saya enggan berbuat demikian dengan alasan persatuan itu sudah terlalu kuat di bawah kepemimpinannya.

Beri pelbagai alasan

"Anwar menerima alasan itu dan kami terus bersahabat sehinggalah apabila beliau memegang jawatan Timbalan Perdana Menteri, beliau tidak mengenali saya lagi," katanya ketika menyampaikan ceramah umum bertajuk *Integriti Sebagai Pemangkin Amalan Terbaik Pemerintahan Negara* di Universiti Tenaga Nasional (UNITEN), di sini, semalam.

Turut hadir, Pengerusi Tenaga Nasional Berhad (TNB), Tan Sri Leo Moggie, dan Naib Canselor UNITEN, Prof Datuk Seri Mashkuri Yaacob.

Mahmood Zuhdi berkata, ketika Anwar dalam penjara, adik lelakinya, Kamil (Majid) sering melawat pemimpin pembangkang itu dan kerap bertanya khabar beliau serta mengakui menyesali tindakannya melupakan kawan baik sendiri ketika beliau berkuasa.

"Anwar mengaku (kepada adik saya), manusia bila jadi orang besar (pemimpin besar) mudah lupa kepada kawan-kawan," katanya sambil me-

negaskan kenyataannya bukan bermotif politik kerana beliau sudah lama bersara dalam bidang itu.


Selain itu, Mahmood Zuhdi yang juga Pesuruhjaya Suruhanjaya Hak Asasi Manusia Malaysia (SUHAKAM) berkata, gerakan lesbian, gay, biseksual dan transgender (LGBT) sangat sensitif untuk dibincangkan suruhanjaya itu kerana ramai pengikutnya memper tahankan kegiatan berkenaan kononnya tidak bercanggah dengan hak asasi manusia sejagat.

Bercanggah dengan moral, agama

"Biarpun ia dikatakan tidak melanggar hak asasi di peringkat global dan tiada dalam Perlembagaan Persekutuan, kegiatan itu bercanggah dengan agama dan moral," katanya.

Mengenai politik, Mahmood Zuhdi, berkata undi golongan atas pagar sangat penting bagi memastikan kemenangan mana-mana parti politik dalam Pilihan Raya Umum Ke-13 (PRU-13).

"Golongan ini melihat dua pihak, iaitu pemerintah dan pembangkang dan jika mana-mana parti boleh mempengeruhi mereka untuk menyokongnya, peluang untuk menang adalah cerah," katanya.



“Kami terus bersahabat sehinggalah apabila beliau memegang jawatan Timbalan Perdana Menteri, beliau tidak mengenali saya lagi”

Mahmood Zuhdi Abdul Majid,
Dekan Kulliyah Ilmu Wahyu dan Sains Kemanusiaan UIAM